

宛陵先生集

一二

蘇子卿

PDG

宛陵先生集目錄卷第五十八

吳紫微見過

范紫微見過不遇

送王學士知亳州

江學士畫鬼拔河篇

送發運唐學士

和司馬學士慮囚

和秋興

送覺上人歸湖州

送閔郎中知池州

和省中植菊

賦張仲通六章

和感予飛舊詩

次答郭功甫

送懷倅李太博

送潘士方之建昌

和吳舍人送郭尉

和劉舍人樂郊詩

送張學士知登州

送王秀才歸建昌

和原甫遊樂郊

和王尚書花木瓜

九月晦謁子華

送王省副北使

送李學士北使

送祖學士北使

送章監簿歸泰州

送棣州唐虞部

金陵有美堂

送張屯田知永州

目錄終

宛陵先生集卷第五十八

宋宛陵梅堯臣聖俞著

吳長文紫微見過

豈敢以貧賤而輒傲賢貴但恨門闌遙赫日去
可畏瘦馬汗長流寸步出無謂是以逾十旬景
慕腸欲沸近因秋雨來纖纖有涼氣九陌可以
行輕服可以衣方將事請見瘡足痛若跣忽枉
騶騎過顏厚言莫旣尚期新醪熟還往襲經緯
乃知君子德曩分替則未

范景仁紫微見過亦謁不遇道上逢之
朝游翔鳳池暮直中書省無由見顏色况乃當
畏景退朝八月朔因得修造請高閣一何新未
歸閭巷靜版刺留姓名不遑佇軒屏驅馬返我
廬道逢騶從整歛轡莫敢行顧望立俄頃還家
稚子言有車來炳炳傳是紫微人將廻猶引領
如何互相乖徒自想形影更待秋風高緩步時
徃省

送王道粹學士知亳州

古者二千石高車駕青驪車前陳曲蓋車後建
朱旗金鼓鳴兩旁壺漿擁通達所付重威惠所
仰撫惇嫠景毫實鉅屏徃俾國相之國相稱疾
還正值民阻饑朝廷急恤養選守莫與宜君嘗
典海陵政績爲衆推今授輒辭命大夫多飛綏
屢上不得請飭馭俄輕齎旣體堯舜仁又答稷
卨知八月風漸高木葉將披披郊原棗已剥場
圃黍可治必期寬賦歛無乃息疲羸何當過苦
縣肯暇觀舊碑

和江隣幾學士畫鬼拔河篇

蒲中古寺壁畫古畫者隋代展子虔分明八鬼
拔河戲中建二旗觀却前東廂四鬼苦用力索
尾拽斷一鬼顛西廂四鬼來背挽雙手碇下抵
以肩龍頭魚身霹靂使持鉞植立旗左偏拔山
夜叉右握斧各司勝負如爭先兩旁撾鼓鼓四
面聲勢助勇努眼圓臂梟張拳擊捧首似與暴
謔意態全當正大鬼按膝坐三鬼帶韉一執旃
操刀擐囊力指督怒髮上直筋舊纏虎尾人身

又踣顧羨挾短挺金鎚堅高下尊卑二十四二
十四鬼無黃泉角錐競強欲何睹曷不各各還
荒埏

送制置發運唐子方學士

本以諫諍稱今以財賦用所爲各有能何必於
茲重東南周萬里海陸竭煮種歛之爲公上豈
是與民共民方苦久弊將缺太平頌有利得設
施無不可抑縱大都守繩墨曷異虱處縫從來
許國心曾未苟祿俸願無輸羨餘終亦歸侍從

次韻和司馬學士慮囚

縲囚往慮問勤恤意不息猛虎在陷穽挑尾尚
求食常憂有註誤非罪罹暴迫藹藹萬乘都憧
憧四方客一遭纖微豐鑑垢莫磨拭是以大君
心惟恐橫抵摘前法著以律後法編以冊每當
炎蒸時獄器用剝滌應無古寃血地下化爲碧
我今因牽吟聊以肝膽瀝刑人皆得辜不似尤
地脉間歸卽解鞍浣手嫌控勒昔言善烹魚必
先漑釜鬲願言保兢慎切勿厭此後夜月可留

翫清樽獨可適一榻寬且平羣動都已寂可用
休其勞不休庶終夕

和吳冲卿江隣幾二學士王景彝舍人

秋興

我謂蓬瀛客清切不畏炎及觀秋興篇無遠此
窮閭乃知天地大節候無愛嫌寒不爲富減暑
不爲貧添向者遭蒸炊靡不同炮燁西風吹雨
至涼氣何纖纖霈然沃萬物不更畢宿占紈扇
捉苦倦盤冰得仍厭蠅癡驅又來蚊嚙喙猶尖

絺衣不復浹醅醪壓初甜客有憎壁蝸

吳詩

客有

困靴襜

江詩

一以礫爲喜一以嬾自謙唯有螭頭

人朝立宮殿簷盛誇樓觀高又極星斗瞻

王詩

予慙異羣公歸意如陶潛自念菊將圻復思禾可

鎌春禾作釀熟獨邀影與蟾此樂雖易有彼榮

安得兼

送覺上人歸湖州

富相國與紫衣

古寺一盂飯弊衣三歲塵相應維帝祝子已得

袍新范叔復何望原生其自貧歸看五湖上終

有泛舟人

送閔郎中知池州

一送池陽守頗懷當日遊青山臨岸盡翠水入
江流楚舊茅爲貢燕來鴈報秋牧之登覽處故
事待君脩

和吳冲卿學士省中植菊

園菓已熟實未墜野卉已老葉未瘁菊叢是時
方發榮潭上籬邊俱有爲一從潭島輔長年一
自籬根圖暫醉今將移近省中蘭壅培早與陶

潛異黃土肥濃沃井泉朱欄屈曲侵堦地勁風
不到何動搖清露能霑誰著意看看重九各登
高金藥滿頭無所忌及此頻邀同舍歡向來莫
羨鍾繇賜我家蓬藿不足云強對嘉章顏起愧
張仲通追賦洛中雜題和嘗歷覽者六章

伊川

山斷瀉伊流灘聲朝暮急東渡馬將登西堤人
已立日看東西舟爭途如不及誰見捕魚郎寒
蓑雨中濕

洛州

上陽宮樹影不隨寒波流天津橋下石激響無
時休至清自照物遇險豈能柔東過白馬去凡
經幾千秋

潛溪

寒溪隨山迴脩竹隱深寺頗逢老僧談能憶先
到事白枯聖君憐緋花土人時不到三十秋依
稀猶可記

真宗嘗駐蹕白枯樹下
花譜有潛溪緋一品

石樓

山腰古石樓杳藹石梯上低窺巖際樹對見龕
中像簷中嵩雲飛檻逼伊湍響同遊已零落歲
月成俯仰

大字寺

庭中兩大樹池上千竿竹竹有紅淚斑樹無衆
鳥宿昔日白傳歸愛吟裴令續間流水西園翻
然入他族

蘄竹

顚肥節腦瘦蘄水長笛材洛陽袁氏塢此竹舊

移來雪霰飽已久竅星誰爲開與君作龍吟吹
發江南梅

次韻任屯田感予飛內翰舊詩

二十四年君日哦翰林風韻郢中歌歲華荏苒
都如昨世事升沉亦苦多燕國駿蹄猶待樂荆
山美寶已逢和賸求海內多何用爛醉人間理
莫過歷覽昔賢皆泯泯尋思魯叟自波波我今
不敢希高躅蹇步年來任跌跎

次韻答德化尉郭功甫遂以送之

江南有嘉禽乘春弄清吭流音入我耳慰懷若
獲貺朝聽已孤高暮聽轉幽曠何多燕雀羣聲
跡不相傍始聞汾陽生文行衆所諒獨哦青山
間悼古或悲愴弃官不屈人頗學陶元亮是時
予愛之顏采莫得望倏然能見過遠涉丹湖浪
袖携一卷詩行橐更無長固與俗人殊於焉識
敦尚嗟嗟二千石不知子所向駭子發論高萬
仞聳孤嶂又如決河湍捧土安可障吾方歎瓌
材恨未逢良匠信哉騏驥駒誰用伯樂相自從